

Uunga siunnersuut:**Namminersornerullutik Oqartussat kommuunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaata allanngortinneqarnera pillugu Inatsisartut inatsisaat**

(Inissianik attartortittakkanik pigisatut inissiannngortitsineq, kaaviaartitsinissamut inerteqqut, piffissaq sioqqullugu taarsigassarsianik akiliineq il. il.)

§ 1

Inatsisartut peqqussutaat nr. 12, 19. november 2007-meersoq tunngavigineqarluni attartortut namminneq inigisaminnik pisisinnaanerit periarfissaareersumi uani allanngortinneqarnerani Inatsisartut inatsisaanni nr. 26, 17. november 2017-imeersumi, Inatsisartut inatsisaatigut nr. 15, 27. november 2018-imeersukkut allanngortinneqartumi, imatut allannguisoqarpoq:

1. Inatsisip qulequtaa ima oqaasertalerneqassaaq:

” Namminersorlutik Oqartussat kommuunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaat nr. 12, 19. november 2007-imeersoq.”

2. § 1 ima oqaasertalerneqassaaq:

” § 1. Una peqqussut inuk attartortoq pineqartillugu Namminersorlutik Oqartussat kommuunillu inissiaataannik attartortittakkanik agguataarinermut tiguisinermullu atuutsinneqassaaq, taamaattorli tak. imm. 2 aamma § 3.

Imm. 2. Imm. 1 taamaallaat inissiaatinut attartortittakkanut, Naalakkersuisut imaluunniit kommunalbestyrelsip inissiatut imaluunniit illutut nammineq pigisatut agguataarneqarsinnaasutut tiguneqarsinnaasutullu aalajangersimasaannut atuutissaaq.”

3. § 2 ima oqaasertalerneqassaaq:

” § 2. Namminersorlutik Oqartussat kommuunillu inissiaataat attartortittakkat, tak. § 1, imm. 1, tiguneqarsinnaapput:

1) Inissiatut nammineq pigisatut, inissiaateqarfimmi attartortittakkat ataaseq sinnerlugu amerlassuseqarpata.

2) Illutut nammineq pigisatut, inissiaateqarfimmi attartortittagaq ataasiuppat”.

4. § 3 ima oqaasertalerneqassaaq:

” § 3. Peqqussut atuutsinneqassanngilaq:

1) Inissianut atorffimmut atatillugu inigineqartussatut immikkoortitanut.

2) Inissianut siunertanut aalajangersimasunut imaluunniit sulisorisat ilaannut atugassiaasunut.

3) Namminersorlutik Oqartussani pisortaatitanut inissianut imaluunniit utaqqiisaasumik inissianut.

- 4) Inissianut inissiaqarfinni sulisunut Namminersorlutik Oqartussani imaluunniit kommunimi atorfeqartitaasunut atugassianut.
- 5) Inissianut innarluutilinnut imaluunniit angallarluttunut immikkut atugassiatut sananeqarsimasunut aaqqissugaasunulluunniit.
- 6) Inissianut iluarsartuussinermut isaterinermullu atatillugu Namminersorlutik Oqartussat kommunilluunniit inisseeqqiffissanik pisariaqartitsinerat naammassiniarlugu atorneqartunut.
- 7) Inissianut kommunalbestyrelsit isumaginninnermi inissaqartitsinissaannut atugassiaasunut.
- 8) Inissianut najugaqarfittut atorneqarnermit allaanerusumut atorneqartunut.
- 9) Ilulissani, Aasianni, Sisimiuni, Nuummi aamma Qaqortumi ilaqutariinnut ataasiakkaanut illut aamma illut affarleriit.

Imm. 2. Pisuni immikkut ittuni Naalackersuisut kommunalbestyrelsiluunniit aalajangersinnaapput, inissiat imm. 1-imi nr. 5-imi taaneqartut ataasiakkaat peqqussummi matumani pineqartunut ilaatinneqassasut.”

5. § 3-p kingorna immikkoortoq nutaaq ilanngunneqassaaq:

Namminersorlutik Oqartussat kommuunillu attartortittagaasa pigisatut inissianngortissinnaanerat.

“ **§ 3 a.** Namminersorlutik Oqartussat inissiaatai attartortittakkat nammineq pigisatut Naalackersuisunit inissianngortinneqarsinnaapput.

Imm. 2. Inissiatut nammineq pigisatut allanngortinneqareerneratigut, tak. imm. 1, Naalackersuisut inissiaatinut ataasiakkaanut piginnittutut pisinnaatitaaffeqarluni pisussaaffeqarlunilu piginneqatigiiffimmuut piginneqataasutut inississapput.

§ 3 b. Kommunip inissiaatai attartortittakkat nammineq pigisatut kommunalbestyrelsimi inissianngortinneqarsinnaapput.

Imm. 2. Inissiatut nammineq pigisatut allanngortinneqareernerisigut, tak. imm. 1, kommunalbestyrelsi inissiaatinut ataasiakkaanut piginnittutut pisinnaatitaaffeqarluni pisussaaffeqarlunilu piginneqatigiiffimmuut piginneqataasutut inississapput.

§ 3 c. Inissiat namminerisamik pigisat § 3a-mi imaluunniit § 3b-mi pineqartut, allanngortitsereernerup kingorna attartortutut inissisimasut tuniniaanikkut tiguisinnaaneramik neqeroorfigineqassapput. § 6 aamma §§ 11-12 taamaaqataanik atuutissapput.

§ 3 d. Inissiani attartortittakkani attartortittakkanik inissiatut nammineq pigisatut allanngortitsinerne, attartortup inissiaq attartukkani pigisatut tigusunngippagu attartorneqartoq allanngortinnagu ingerlatiinnarneqassaaq.

Imm. 2. Inissiani attartortittakkani inissiat allat inissiatut nammineq pigisatut allanngortinneqarpata, attartortumut attartornermi atugassarititaasut, tak. imm. 1, allanngortinneqassanngillat.

Imm. 3. Ileqqorissaarnissaq pillugu malittarisassani aalajangersakkat, piginneqatigiilluni inissiaatillit peqatigiiffiannit akuerineqartut, attartortunut illuummiiginnartunut, pisussaaffiliipput.

§ 3 e. Inissiat suli pisiarineqanngitsut § 3 a-mut imaluunniit 3 b-mut tunngasut, tamanut ammasumik tuniniaanikkut tunineqassaaq, illup nalingata niuffaffimmi nalilerneratigut taamaattorli minnerpaamik 7.000 kr./m² illup annertussusaa tamakkiisoq, tak. taamaattorli imm. 2-3.

Imm. 2. Naalackersuisut Inatsisartut Aningaasaqarnermut akileraartarnermullu ataatsimiititaliaanit allakkatigut akuerineqarnermikkut niuernermi nalinganit akikinnerusumik aamma 7.000 kr/m²-imut akikinnerusumik inimik tuniniaasinnaallutillu tunisaqarsinnaapput.

Imm. 3. Kommunalbestyrelsi Naalackersuisunit allakkatigut akuerineqarnermikkut niuernermi nalinganit akikinnerusumik aamma 7.000 kr./m²-imut akikinnerusumik inimik tuniniaasinnaallutillu tunisaqarsinnaapput.

Imm. 4. Naalackersuisut kommunalbestyrelsilu tamanut ammasumik inimik tuniniaasariaqanngilaq, inissianillu attartorneqanngitsunik attartortitsisoqarsinnaavoq, tak. § 3d, tamanna inissianut inoqarfinni pineqartunut inissiat niuerfimmi nalinganut annaasaqaataasinnaappata. Allamut attartortitsineq taamaallaat atugassarititaasut piffissamut killiligaasut tunngavigalugit aamma qaammatit 12-ikkaarlugit pisinnaavoq, qaammatit 6-ikkaarlugit sivitsuisarnissaq periarfissaqarluni.”

6. § 4 ima oqaasertalerneqassaaq:

” **§ 4.** Namminersorlutik Oqartussat kommunilluunniit inissiaataanni attartortittakkani attartortoq inissiamik attartukkaminik inissiatut imaluunniit illutut nammineq pigisatut tigusinissaminik qinnuteqarsinnaavoq. Qinnuteqaat Naalackersuisunut imaluunniit kommunalbestyrelsimut nassiunneqassaaq, tassungalu qinnuteqartup tunisinermi akigititaasup ilaata sinneruttup aningaasalersornissaanut periarfissaqarneranik aningaaserivimmiit nalunaarut pisussaaffiliinngitsoq ilanngunneqassaaq, tak. § 14, imm. 1.”

7. § 5 ima oqaasertalerneqassaaq:

” **§ 5.** Inissiamik attartortittakkamik inissiatut nammineq pigisatut qinnuteqaat akuerineqarpat, Naalackersuisut imaluunniit kommunalbestyrelsip inissiaammi inissiat attartortittakkat inissianut nammineq pigisanut agguataassavai, kiisalu qinnuteqartup piginneqatigiilluni inissiaatillit peqatigiiffiannik pilersitsinissaanik aammalu piginnittut peqatigiiffiata malittarisassaanik suliaqarneranut ikiutissalluni.

Imm. 2. Naalackersuisut inissiaammi inissiat attartortittakkat agguataarneqarnissaannik maleruagassanik sukumiinerusunik aalajangersaasinnaapput, taakkununga ilanngullugit nalunaarsuineq piginnittunullu immikkut ittumik piumasarisat.”

8. § 6 ima oqaasertalerneqassaaq:

” **§ 6.** Inissiaateqarfimmi inissiat attartortittakkat inissianut nammineq pigisanut agguataarneqareerpata, Naalackersuisut imaluunniit kommunalbestyrelsip makku qinnuteqartumut nassitissavai:

- 1) Qinnuteqartup inissiamik attartortittakkamik najukkaminik inissiatut nammineq pigisatut tigusinnaaneranut allakkatigut neqeroorut.
- 2) Piginnittut peqatigiiffiat pillugu paasissutissat aamma malittarisassat assilineri.

- 3) Tunisinissamut tamakkiisumut pilersaarusiaq, inissiami nammineq pigisami agguaqatigiisitsinissamut kisitsisitalik.
- 4) Inissiap nammineq pigisap sananeqarneranut nassuiaatinut paasissutissat, tak. ilanngussaq 1.
- 5) Inissiap nammineq pigisap niuernermi nalinganut paasissutissat.
- 6) Najugaqarfimmi imaluunniit ingerlatsinermut aserfallatsaaliuinernullu immikkoortortami, inissiap attartortittakkap attuumassuteqarfigisaani ukiumi pineqartumi ingerlatsinermut missingersuutit.
- 7) Najugaqarfimmi imaluunniit ingerlatsinermut aserfallatsaaliuinernullu immikkoortortami, inissiap attartortittakkap attuumassuteqarfigisaani naatsorsuutit akuerisat kingulliit.
- 8) Akiliisussatut pisussaaffiit imaluunniit piginnittunut immikkut ittumik piumasarisat nalunaarsorneqarsimasinnaasut, tiguserup kingorna inissianut nammineq pigisanut attuumassuteqartussatut nalilerneqartut pillugit paasissutissat.

Imm. 2. Tigusinissamik neqeroorut Naalackersuisut imaluunniit kommunalbestyrelsip allakkatigut neqeroorutaata nassiutereernerani qaammatit pingasut qaangiutsinnagit akuerineqassaaq.

Imm. 3. Inissiaateqarfimmi inissiat attartortittakkat inissianut nammineq pigisanut agguataarneqareerpata, Naalackersuisut imaluunniit kommunalbestyrelsip attartortutut sinneruttunut uku nassiutissavaat:

- 1) Inissiamik attartortittakkamik najukkaminik inissiatut nammineq pigisatut tiguisinnaanerit pillugu nalunaarut.
- 2) Piginnittut peqatigiiffiat pillugu paasissutissat aamma malittarisassat assilineri.”

9. § 7 ima oqaasertalerneqassaaq:

” § 7. Attartortup inissiamik attartukkaminik inissiatut nammineq pigisatut tigusinissamut periarfissaminik atuinnissani kissaatiginngikkuniuk:

- 1) Inissiaammi inissiamik attartortuunnarsinnaavoq.
- 2) Naalackersuisut imaluunniit kommunalbestyrelsip illoqarfimmi najukkami inissiamik attartortittakkamik allamik neqeroorutaa akuerisinnaavaa, tamanna inissianik attartortitsisarneq pillugu peqqussummi periarfissaqarpat.
- 3) Inissiat attartortittakkat allat inissiatut nammineq pigisatut allanngortinneqarpata, attartortumut attartornermi atugassarititaasut, tak. imm. 1, allanngortinneqassanngillat.

Imm. 3. Inissiaateqarfimmi inissianik nammineq pigisassanik agguataariffiusumi attartortuunnartussamut piginnittut peqatigiiffiata malittarisassaani torersaarnissamut aalajangersakkat atuuttussaapput.”

10. § 9 ima oqaasertalerneqassaaq:

” § 9. Inissiaammi inissianik nammineq pigisassanik agguataariffiusumi inissiaq attartortittagaq inoqanngitsoq Namminersorlutik Oqartussanit imaluunniit kommunimit pigineqartoq inissianik attartortitsisarneq pillugu Inatsisartut peqqussutaanni maleruagassat naapertorlugit innersuunneqanngippat, Naalackersuisut imaluunniit kommunalbestyrelsip inissiaq attartortittagaq inoqanngitsoq tamanut ammasumik tuniniaanikkut tunisinnaavaa.

Pisinermut atatillugu aningaasartuutissat tamarmik pisisumit akilerneqassapput.

Imm. 2. Tamanut ammasumik tuniniaanermi § 11 atorneqassanngilaq.”

11. § 10 ima oqaasertalerneqassaaq:

” § 10. Inissiamik attartortittakkamik illutut nammineq pigisatut tigusinissamik qinnuteqaat akuerineqarpat, Naalakkersuisut imaluunniit kommunalbestyrelsip makku qinnuteqartumut nassiutissavai:

- 1) Qinnuteqartup inissiamik attartortittakkamik najukkaminik illutut nammineq pigisatut tigusisinnaaneranut allakkatigut neqeroorut.
- 2) Inissiap nammineq pigisap sananeqarneranut nassuiaatinut paasissutissat, tak. ilanngussaq 1.
- 3) Illup nammineq pigisap niuernermininganut paasissutissat.
- 4) Akiliisussatut pisussaaffiit imaluunniit piginnittunut immikkut ittumik piumasarisat nalunaarsorneqarsimasinnaasut, tigusinerup kingorna illumut nammineq pigisamut attuumassuteqartutut nalilerneqartut pillugit paasissutissat.

Imm. 2. Tigusinissamik neqeroorut Naalakkersuisut imaluunniit kommunalbestyrelsip allakkatigut neqeroorutaata nassiutereernerani qaammatit pingasut qaangiutsinnagit akuerineqassaaq.”

12. § 11 imatut oqaasertalerneqassaaq:

” § 11. Nammineq inissiarthaanermi tunisinerminingakigitinneqartumut naapertuuttumik niuernerminingakigititaasut tunngavigineqassapput.

Imm. 2. Inissiani attartorneqarsinnaasuni attartortut pingasunit amerlanerusunilluunniit attartortoqartuni, tunisinerminingakigitinneqartoq 20 %-inik akikillineqassaaq. Sumiiffimmi pigisanut aalaakkaasunut qularnaveeqqusiussanut realkredit-imit taarsigassarsisinnaannginnerminingallagaqaammik uppernarsaatissaqarnerminingakigititaq 30 %-inik akikillineqassaaq.

Imm. 3. Aggualussinermit tigusinernullu aningaasartuutitut tamanut matussutissatut, taakkununga ilanngullugit nalilersuinermit, siunnersorneqarnermit, eqqartuussissuserisoqarnermit aamma piginnittunngornermit akiliutissanut aningaasartuutitut, tunisinerminingakigititaq 50.000 koruuninik ilaneqassaaq.”

13. § 12 imatut oqaasertalerneqassaaq:

” § 12. Illuutip massakkut niuerfinni nalinga illuutitut nalilersuinerit illuutit aalaakkaasut najugaqarfissatut pisarisarnerannut tuniartarnerannullu Kalaallit Nunaanni suliaqartunik illuutitut sullissisartunit ilisimasalinnit naatsorsuiffigineqassaaq.”

14. § 13 ima oqaasertalerneqassaaq

” § 13. Pisisoq tunisinerminingakigititaasumit akikilliliiffigineqartillugu, tak. § 11 imm. 2, Naalakkersuisut inissiamut nammineq pigisamut akit nikingassutaannut

qularnaveeqqusiissummik nalunaarsuissapput, taannalu tunisinermi akiusup akikillisaanerup amerlaqataanik nalilerneqassaaq.

Imm. 2. Pisisoq tunisinermi akigititaasumit akikilliliiffigineqartillugu, tak. § 11 imm. 2, kommunalbestyrelsi inissiamut nammineq pigisamut akit nikingassutaannut qularnaveeqqusiissummik nalunaarsuissapput, taannalu tunisinermi akiusup akikillisaanerup amerlaqataanik nalilerneqassaaq.

Imm. 3. Akit nikingassutaannut qularnaveeqqusiissut, Naalackersuisut kommunilluunniit taarsigassarsiarititaannut qularnaveeqqusiissutip akilereernerani akilerneqartussatut inissisimavoq.

Imm. 4. Akit nikerarnerinut qularnaveeqqusiussaqluni taarsigassarsiat tunisinermi akigititaasup 20 %-ii tiguneqarneraniit ukiut tallimat ernialersugaanatillu akilersuutitaqassanngillat. Qularnaveeqquttip ukiut 15-it ingerlanerani ukiumut 1/15-eriaammik nalikillisoqartassaaq aamma nalikilliliinerup ingerlanerata naanerani nalunaarsorneqarunnaassalluni.

Imm. 5. Tunisinermi 30 %-inik akimut qularnaveeqqut akigitinneqartumut taarsigassarsiat ukiuni qulini erniaqaratillu akilersugassaassanngillat. Tamatuma kingorna qularnaveeqqut ukiut 15-it ingerlanerani ukiumut 1/15-eriaammik nalikillisinneqartassaaq aamma nalikilliliinerup ingerlanerata naanerani nalunaarsorneqarunnaassalluni.

Imm. 6. Toqusoqarnerani, averusernermi avinnermiluunniit piginnittut paarlaannerat eqqaassanngikkaanni, piginnittut paarlaanneranni qularnaveeqqut akilerneqartussanngorluni atorunnaartaassaaq.

Imm. 7. Qularnaveeqqutissat isumakkeerutaasinnaaneri pillugit Naalackersuisut malittarisassaliorsinnaapput.”

15. § 14 ima oqaasertalerneqassaaq:

” **§ 14.** Attartortup inissiamik attartukkaminik inissiatut illutulluunniit nammineq pigisatut tigusineranut atatillugu, attartortoq tunisinermut akiusup 40%-ia tikillugu Namminersorlutik Oqartussanit kommunimilluunniit taarsigassarsitinneqarnissaminik piumasaqarsinnaavoq. Namminersorerullutik Oqartussat kommuniluunniit tunisinermut akiusup sinneranut aningaasalersueqataasinnaanngillat.

Imm. 2. Taarsigassarsiat ukiuni 20-ni erniaqaratillu akilersugassaassanngillat, tamatumalu kingorna taarsigassarsiatut angeqqatigiinnik annertussusilerlugit, ukiumut Nationalbankip erniarititaa 3%-inik ilallugu erniaqartinneqarlutik ukiuni 15-ini akilersugassanngortinneqassallutik. ”

16. § 14-imi imm. 3-tut ilanngunneqassaaq:

” *Imm. 3.* Realkredit aqutigalugu qularnaveeqqusiilluni inoqarfimmilu pineqartumi aalajangersimasumik illumik taarsigassarsititsisoqarsinnaannginneranik uppersaasiisoqarpat imm. 1 tunngavigalugu tunisinermi akigitinneqartup 50 %-iata naleqqataanik aningaasat attartukkat amerlineqarsinnaapput. Akigitinneqartup 50%-iata naleqqataanik attartortitassat ukiuni qulini erniaqartinneqaratillu akilersugassaassanngillat, ukiut

taakkua qaangiunneranni assigiimmik akilersuilluni ukiut 20-t sinnerlugit Nationalbankip erniaritittagaa procentinik pingasunik ilallugu akilersugassanngussallutik.”

17. § 14 b ima oqaasertalerneqassaaq:

” **§ 14 b.** Taarsigassarsisup taarsigassarsiani maanna naliusut malillugit sioqqutsilluni akilersinnaavai.

Imm. 2. Taarsigassarsisup taarsigassarsiani sioqqutsilluni akilerpagit, akiitsut sinneri ullormi qinnuteqaatip tunniunneqarfiani ernialiinermi erniaritinneqartoq Naatsorsueqqissaartarfiup kingullermik piffissamut qaammatinut 12-inut atuisunut akigititanut naleqqataanik 1 procentpointimik ilallugu allanngortitsinera naatsorsuiffigineqartoq atorlugu utertitsinissaq aalajangersarneqassaaq.

Imm. 3. Akiitsut sinneri taarsigassarsisup allakkatigut inaarilluni akiliinissaq pillugu noqqaaneraniit aamma taarsigassarsiani piffissamut ernialersuiffiunanilu akilersuiffiusussaannngitsumut sinneruttumut kingumut naatsorsorneqassapput, taamaattorli taarsigassarsiat tunniunneqarneranniit siusinnerpaamik ukiunut tallimanut.”

18. § 14 b kingorna ilanngunneqassaaq:

” **§ 14 c.** Piffissap tigusiffiup nalaani § 3c, imm. 1-mut attuumassutilimmik nammineq pigisamik inissiarisioq 30-nik inorlugilluunniit ukioqarsimappat, pisortanit aningaasaliiffigineqarnissaminut pisinnaatitaaffeqarpoq, pisinermi akigititap niuerfimmi nalinga sipporsimangippagu, tak. § 12. Aalajangersakkat § 11 aamma § 14 malillugit pisortanit aningaasalersorneqarnissaq naatsorsorneqassaaq.

Imm. 2. Piffissap tigusiffiusup nalaani inissiamik imaluunniit illumik nammineq piginnittunut imaluunniit piginneqataasunut taarsigassarsisitsisoqarsinnanangilaq. Pisisup tigusinermi nalaani inissiamik imaluunniit illumik nammineq piginnittuunani imaluunniit piginneqataanani pisisup ilumoorluinnarluni nalunaarutigissavaa.”

19. § 14 c kingorna ilanngunneqassaaq:

” **§ 14 d.** Namminersorlutik Oqartussanut imaluunniit Kalaallit Nunaanni kommuuninut qularnaveeqqusiinermut allagartat aamma akiitsunut allagartat Illuliortiternernut aningaasalersuisarneq pillugu Inatsisartut peqqussutaannut uunga imaluunniit siusinnerusukkut Namminersorlutik Oqartussat kommuunillu inissianik attartortittagaannik inissiamik piginnittutut imaluunniit illumik piginnittutut tigusisarneq pillugu inatsisaasimasut naapertorlugit tunniunneqartut kaaviiartitsinermut, qularnaveeqqusiisarnernut imaluunniit akiligassaqarfimmiit malersugaanissamut atorneqarsinnaanngillat.”

20. § 15 ima oqaasertalerneqassaaq:

” **§ 15.** Namminersorlutik Oqartussat kommunilluunniit taarsigassarsiarititaat inissiap illulluunniit nammineq pigisap qularnaveeqqusiunneratigut qularnaarneqassapput. Taarsigassarsiat, inissiaq illulluunniit nammineq pigisap qularnaveeqqusiullugu tunisinermi

akiusup sinneranut aningaasalersuutissatut taarsigassarsiarititat akilereernerini akilerneqartussatut ataqqillugit inissisimassapput.”

21. § 16 imatut oqaasertalerneqassaaq:

” § 16. Piginnittut nikinneri pillugit Inatsisartut peqqussutaat una naapertorlugu Naalakkersuisut kommunalbestyrelsilu inissianik imaluunniit illunik piginnittut taarsigassarsianik tapiiffigitissimasut allanngoraangata tamatigut ilisimatinneqartassapput. Taarsigassarsiat taarsigassarsisup nikinnerani akilerneqassapput, tamanna Inatsisartut inatsisaat una naapertorlugu piginnittut nikinnerini inuit namminiussusillit taarsiaqareersimannngikkaangata.

Imm. 2. Piginnittut nikinnerini tamani pisortat taarsigassarsisitsinerani taarsigassarsiat angissusiata 15 %-iatut angitigisumik piginnittut nikinnerannut akiliutissaq akilerneqartassaaq. Pisortat taarsigassarsisitsineranik tigusinermut piumasarineqarpoq piginnittut nikinneranni akiliutip akilerneqarnissaa.

Imm. 3. Piginnittut nikinnerini, niuernermi aningaasartuutit missiliussat tapiliunneri ilanngaatilugit pisinermi akip 90 %-iinik annerpaamik aningaasartaqartut taarsigassarsiat katinneri pisisumit tiguneqartut taarsigassarsinermi ataqqineqassapput.

Imm. 4. Piginnittut nikinnerat pillugu paasissutissiisussaataaneq, tak. imm. 1, pisisumiillunilu tunisisumiippoq.

Imm. 5. Piginnittut nikinnerat pillugu paasissutissiissut pissaaq, tunniussinissamik pituttorsimasumik isumaqatigiissusiornermit kingusinnerpaamik sapaatip akunnerata ataatsip qaangiunnerani.”

22. § 16 kingorna ikkunneqassaaq:

” § 16 a. Namminersorlutik Oqartussanut kommunimullu taarsigassarsiat akiligassanngussapput, ima pisoqarpat:

- 1) Qularnaveeqqusiussaqarluni taarsigassarsinermi piumasaqaatigineqartut malinneqanngippata.
- 2) Taarsigassarsisup inissiaq illersorneqarsinnaasumik aserfallatsaalisimanngippagu, aamma Naalakkersuisunit imaluunniit kommunalbestyrelsimit akiligassarsisitsisup qularnaveeqqusiissutinik qulakkeerinnissimanngitsoq aserfallatsaaliisimannginneq uppersippagu.
- 3) Taarsigassarsisup inissiaq ikuallattoornissamut illullu ajoqusersinnaaneranut sillimmasersimanngippagu.
- 4) Inissianik attartortitsisarneq pillugu Inatsisartut peqqussutaanni ineqarnermut akiliutit angissusilerneqartarnerannut pillugu aalajangersakkanut akerliusunik inissiamik taarsigassarsisoq attartortitsippat.
- 5) Inissiaq taarsigassarsisumut imaluunniit attartortumut taassumalu inoqutigiivinut najugaqarfissatut atornagu siunertanut allanut tamakkiisumik ilaannakortumilluunniit atornerarpat. Taamaattoq inuussutissarsiuutit minnerusut namminersortut taarsigassarsisumit imaluunniit attartortumit taassumalu inoqutigiivinut ingerlanneqartut mininneqarput.
- 6) Pisoq aamma tunisisoq piginnittup nikinnera paasissutissiissutiginnngippassuk, tak. § 16,

imm. 1, 4 aamma 5.

Imm. 2. Imm. 1, nr. 4 taamaaqataanik atorneqassaaq inissiaq inatsisitigut pisinnaatitaasumut pisussaataitaasumullu attartortinneqarpat.

§ 16 b. Illumut taarsigassarsiat allanngorpata, piginnittullu nikinngippata Naalakkersuisut taarsigassarsiaareersunut illuutip Naalakkersuisunit tunniunneqartup niuerfinni nalingata pisortani taarsigassarsiarineqartut illuummi qularnaveeqqusiinikkut qularnaarneqartut 90 %-iannik annerpaamik ilanngaaffiginerinut ataqqinninnermut tulleriarinerermullu uppersaasinnaavoq, taamaattoq tak. imm. 3

Imm. 2. Illumut taarsigassarsiat allanngorpata, piginnittullu nikinngippata kommunalbestyrelsi taarsigassarsiaareersunut illuutip kommunalbestyrelsimit tunniunneqartup niuerfinni nalingata pisortani taarsigassarsiarineqartut illuummi qularnaveeqqusiinikkut qularnaarneqartut 90 %-iannik annerpaamik ilanngaaffiginerinut ataqqinninnermut tulleriarinerermullu uppersaasinnaavoq, taamaattoq tak. imm. 3.

Imm. 3. Taamaattoq illuutitut ukiut 20-t sinnerlugit pisoqaassusilinnut taarsigassarsiaareersut illuutip niuerfinni nalingata 80 %-iannut angissusilerneqarsinnaapput, matumani illuummi qularnaveeqqusiinikkut pisortani taarsigassarsiarineqartut inerneranni ilanngaateqarnikkut.

Imm. 4. Naalakkersuisuniit kommunalbestyrelsiniillu ataqqinninnermut tulleriarinerermullu uppersaanissaani illuummut akiligassangortut allat kingusinnerusukkut assinganik tulleriarinerermik uppersaasimanersut apeqqaassaaq.

Imm. 5. Illuutip pisoqaassusaa illuummut atuinissamut akuersissutaagallartumut ulluluneqartoq atorlugu naatsorsorneqassaaq.

Imm. 6. Illuutip massakkut niuerfinni nalinga illuutitut nalilersuinerit illuutit aalaakkaasut najugaqarfissatut pisarisarnerannut tuniartarnerannullu suliaqartunik illuutitut sullissisartunit ilisimasalinnit naatsorsuiffiqineqassaaq. Illuutitut nalilersuinerit ataqqinninnissamut tulleriarinerermillu uppersaanissaanut qinnuteqaatit kingusinnerpaamik ullut 30-t sioqqullugit suliarineqareersimassapput. ”

23. Inatsisartut peqqussutaannut ilanngussaq 2 atorunnaassaaq.

§ 2

Inatsisartut Inatsisaat ulloq 1. januar 2025 atuutilissaaq.

Imm. 2 Taarsigassarsiat allannguutissatut siunnersuutip atuutilernissaata sioqqullugu, taamaattoq siusinnerpaamik taarsigassarsiap tunniunneraniit ukiut tallimat kingornagut, nassiunneqartut siusissukkut akilernissaannut qinnuteqaat § 14 b atuukkallartoq tunngavigalugu suliarineqassapput aalajangiiffiqineqarlutillu.